

U V O D

Stečaj je posljedica stanja dubokog poremećaja u poslovanju pravnog lica. Dok se stečaj ne otvori, subjekt normalno egzistira. No, već u prvom trenutku poremećaja u poslovanju, naročito u plaćanju, pravne radnje subjekta postaju upitne, jer su njegovi povjerioci i nakon otvaranja stečaja ovlašteni da intervenišu u te pravne radnje. Cilj stečajnog postupka može biti i provođenje stečajnog plana, naročito radi održavanja djelatnosti stečajnog dužnika.

Poznato je da je stečaj radikalna mjera čijim okončanjem najčešće svi gube i on nesumnjivo proizvodi značajne socijalne i društvene probleme. Sigurno je da je efikasan postupak stečaja jedno od ključnih pitanja od koga zavisi i uspješno vođenje ekonomske politike. Zbog toga se donošenjem zakona o stečajnom postupku pokušalo na najbolji mogući način izvršiti višedimenzionalna transformacija stečajnog prava, koja bi trebala pozitivno uticati na strana ulaganja i proces integracije u moderne tržišne tokove. Zakoni o stečajnom postupku u Bosni i Hercegovini (ZSP Republike Srpske i ZSP Federacije Bosne i Hercegovine) usvojili su evropski koncept stečajnog postupka.

Koja je uloga nadzora nad provođenjem stečajnog plana, kakav je njegov značaj i smisao? U ovom radu biće riječi o provođenju stečajnog plana, tačnije, o nadzoru nad njegovim provođenjem. Najprije nam valja objasniti pojam i sadržinu stečajnog plana, te elemente iz kojih se on sastoji i mjere koje iz njega proizilaze. Mjere predviđene stečajnim planom predstavljaju njegov bitan element, jer zapravo određuju smjer kretanja samog stečajnog postupka, pa im treba posvetiti određenu pažnju. Zatim će biti riječi o pojedinostima nadzora nad ispunjenjem stečajnog plana koje proističu iz domaćih zakona, ali će biti interesantno i dati kratak uvid u zakonodavnu praksu zemalja u regionu.